

PRIPREME ZA RAMAZAN

Neka je hvala Allahu, dž.š., Gospodaru svih svjetova. Neka su salavat i selam na Poslanika Muhammeda, s.a.v.s., njegovu časnu porodicu, ashabe i sve sljedbenike, koji se raduju mjesecu Ramazanu i za njega se pripremaju.

Braćo moja u Dini Islamu! Sutra navečer, akobogda, počinje jedan od četiri časna ili sveta mjeseca, mjesec Redžeb, koji je poznat i kao Allahov mjesec. Sa njegovim početkom počinju i tzv. "učajluci", odnosno tromjesečje Redžeb-Ša'ban-Ramazan. Ulazimo polahko u period, koji je Poslanik, s.a.v.s., započinjao dovom: "*Allahumme barik lena fi Redžebe ve Ša'ban, ve belligna Ramadan.*" (Allahu moj, daj nam bereket u Redžebu i Ša'banu i dovedi nas Ramazanu.) Period u kome bismo trebali polahko da počnemo sa pripremama za doček mubarek-mjeseca Ramazana.

Ramazan jeste mjesec Allahove milosti i oprosta, ali da bi čovjek mogao svim svojim bićem da uživa u njemu, mora se potruditi koliko god je to moguće da očisti svoju dušu i srce prije njegovog početka. U tome će mu ponajviše pomoći svijest da je Redžeb časni mjesec, u kome je Uzvišeni Allah zabranio činjenje velikih grijeha. U tom smislu još jednom pozivam sve one koji su naumili da proslave božić i međunarodnu novu godinu i tim povodom okite jelku, da još jednom razmisle o svojim planovima, jer činjenje širka ne samo da ne ide na ruku njihovim pripremama za doček mjeseca Ramazana, već i tovari na njih teške i opasne grijehe od kojih se neće moći tako lahko otresti. Njihov užitak (ako je to uopće užitak) neće trajati dugo, ali će kajanje biti dugo i gorko.

Ramazan je mjesec posta, zato je jedna od najboljih priprema za doček mjeseca ramazana upravo dobrovoljni post. U predajama se prenosi da je Poslanik, s.a.v.s., posebno puno postio u mjesecu Ša'banu. To je ujedno prilika i za nadoknadu posta. Naime, ako ima naše braće i sestara koje su iz opravdanih razloga propustili da poste određene dane mjeseca ramazana, sada imaju dobru priliku za nadoknadu. Mi se, evo, nalazimo pred vratima zime i u najkraćim danima u toku godine, kada se post skoro i ne osjeti.

S tim u vezi pozivam one ljude koji ne mogu nikako da poste, a koji nisu platili **fidju**, da svoju obavezu što prije izvrše. Naime, fidja je nadoknada za post onim osobama koje iz fizičkih ili zdravstvenih razloga ne mogu nikako da poste. Ona podrazumijeva da se za svaki propušteni dan posta obezbijede dva obroka za jednog siromaha ili da mu se dadne novac u vrijednosti dva obroka.

Posebnu pažnju skrećem ljudima koji su namjerno propustili ili pokvarili ramazanski post, neka navrijeme izvrše svoju obavezu **keffareta**. Keffaret podrazumijeva post od 60 uzastopnih dana plus onoliko dana koliko je bez opravdanog razloga propušteno da se posti. To znači, ako neko bez opravdanja cijeli mjesec ramazan nije postio on, ustvari, mora tri mjeseca uzastopno da posti, što je do ramazana nemoguće postići (ukoliko već nije započeo post). Takvim osobama preporučujem kombinaciju posta i fidje, tj. da malo poste a malo plate fidju i tako regulišu svoj keffaret.

Ramazan je mjesec posebne darežljivosti. Muhammed, s.a.v.s., je bio darežljiv čovjek ali je najdarežljiviji bio u mjesecu ramazanu. To je istovremeno i poziv nama da budemo darežljivi – uvijek, a posebno u mjesecu ramazanu. I to prvo da krenemo od svojih najbližih i prijatelja, jer se oni stide da potraže našu pomoć. Nekad moramo i sami da shvatimo da im je naša pomoć potrebna.

S tim u vezi se prenosi da je jedan od prijatelja Ibrahima b. Edhema prošao pored njega dok je sjedio sa ostalim prijateljima i nije ih pozdravio. Prijatelji su to odmah primjetili i ružno prokomentarisali. Ibrahim im reče: "Možda ga je snašla kakva nevolja. Niko se ne okreće od svojih prijatelja i ne ponaša zbunjeno, osim onaj koga je pogodila nevolja." Zatim je otišao do onog prijatelja i upitao ga zašto ih nije pozdravio, pa mu prijatelj reče: "Moja žena treba da se porodi a ja nemam novca da kupim ono što joj treba." Ibrahim se zatim vratio društvu i rekao im: "Dvaput smo mu učinili zulum (nepravdu). Prvi put kad smo loše o njemu pomislili, a drugi put kad smo zanemarili njegove potrebe zbog čega je upao u nevolju." Zatim je Ibrahim otišao svojoj kući i tamo našao dva dinara (zlatnika), pa je za jedan dinar kupio meso, med, ulje i brašno a zatim požurio do kuće svoga prijatelja. Ostavio je stvari pred vrata a zatim pokucao. Kada je žena od njegovog prijatelja upitala ko je pred vratima, on se predstavio i rekao joj da uzme stvari koje je donio. Kada je otvorila vrata, našla je spomenute namirnice i na njima onaj drugi dinar, pa je proučila dovu: "Allahu moj, nadoknadi Ibrahimu b. Edhemu za ovaj dan."

Braćo moja, pred nama su i tradicionalne mubarek-noći, od kojih je prva u iduću četvrtak, akobogda, a to je Lejletur-Regaib (Noć želja). Iskoristimo tu noć, ali i ostale duge noći, odnosno iskoristimo priliku dok je zora jako kasno, da provedemo dio zadnje trećine noći u klanjanju nafile i učenju dova, tj. da se polahko pripremimo za teraviju i ramazanske dove.

Naravno, uslov za ispravnost nafile jeste redovno klanjanje propisanih namaza. Ako među nama još uvijek ima onih koji ne klanjaju redovno, neka im bude zadatak da do početka mjeseca ramazana počnu redovno da klanjaju. Ako im je puno odjednom pet namaza, neka klanjaju po dva-tri dnevno, pa neka vremenom povećaju. Ako im je puno da klanjaju cijele namaze, neka za početak klanjaju samo farzove.

I, na kraju, ne zaboravimo na zikr i druženje sa Kur'anom (bilo učenjem bilo slušanjem), jer će nas oni pripremiti za ramazanske zikrove i mukabelu.

Molim Dragog Allaha da nam olakša i ukabuli naše ramazanske pripreme i da nam dadne snage, zdravlja i volje da u hajru i bereketu dočekamo i provedemo mubarek-mjesec ramazan. Amin.